

D.R. 19/2012

RANG UNDANG-UNDANG

b e r n a m a

Suatu Akta untuk meminda Akta Kualiti Alam Sekeliling 1974.

[]

DIPERBUAT oleh Parlimen Malaysia seperti yang berikut:

Tajuk ringkas dan permulaan kuat kuasa

1. (1) Akta ini bolehlah dinamakan Akta Kualiti Alam Sekeliling (Pindaan) 2012.

(2) Akta ini mula berkuat kuasa pada tarikh yang ditetapkan oleh Menteri melalui pemberitahuan dalam *Warta*.

Pindaan am

2. Akta Kualiti Alam Sekeliling 1974 [*Akta 127*], yang disebut “Akta ibu” dalam Akta ini, dipinda dengan menggantikan perkataan “kakitangan yang layak” di mana-mana jua ia terdapat dengan perkataan “orang yang layak”.

Pindaan seksyen 2**3. Seksyen 2 Akta ibu dipinda—**

(a) dengan memasukkan selepas takrif “minyak” takrif yang berikut:

‘ “orang yang berwibawa” ertinya orang yang berwibawa untuk menjalankan aktiviti sebagaimana yang dinyatakan dalam seksyen 49A;’;

(b) dengan memasukkan selepas takrif “orang yang berwibawa” takrif yang berikut:

‘ “orang yang layak” ertinya seseorang yang memenuhi kehendak sebagaimana yang ditentukan oleh Ketua Pengarah untuk menjalankan audit alam sekeliling dan penilaian kesan kepada alam sekeliling, dan untuk mengemukakan laporan mengenainya;’;

(c) dengan menggantikan takrif “pencemaran” dengan takrif yang berikut:

‘ “pencemaran” ertinya suatu perbuatan atau proses, sama ada semula jadi atau buatan, yang menyebabkan kemasukan apa-apa bahan cemar ke dalam alam sekeliling dengan melanggar syarat-syarat yang boleh diterima sebagaimana yang dinyatakan dalam peraturan-peraturan yang dibuat di bawah seksyen 21;’;

(d) dengan memasukkan selepas takrif “program pengawasan” takrif yang berikut:

‘ “rancangan fizikal” ertinya—

- (i) rancangan fizikal negara di bawah Akta Perancangan Bandar dan Desa 1976 [*Akta 172*];
- (ii) rancangan fizikal yang meliputi Sabah di bawah Ordinan Perancangan Bandar dan Desa [*Sabah Bab 141*];
- (iii) rancangan fizikal yang meliputi Sarawak di bawah Kanun Tanah Sarawak [*Bab 81*];’; dan

- (e) dengan memasukkan selepas takrif “rancangan fizikal” takrif yang berikut:

“rancangan pemajuan” mempunyai erti yang sama yang diberikan kepadanya di bawah Akta Perancangan Bandar dan Desa 1976;’.

Pindaan seksyen 4

4. Seksyen 4 Akta ibu dipinda—

- (a) dengan menggantikan subseksyen (2) dengan subseksyen yang berikut:

“(2) Majlis hendaklah terdiri daripada anggota yang berikut:

- (a) Pengerusi yang hendaklah dilantik oleh Menteri;
- (b) seorang wakil Menteri yang dipertanggungjawabkan dengan tanggungjawab bagi sumber asli dan alam sekitar;
- (c) seorang wakil Menteri yang dipertanggungjawabkan dengan tanggungjawab bagi sains, teknologi dan inovasi;
- (d) seorang wakil Menteri yang dipertanggungjawabkan dengan tanggungjawab bagi perdagangan antarabangsa dan industri;
- (e) seorang wakil Menteri yang dipertanggungjawabkan dengan tanggungjawab bagi perdagangan dalam negeri dan hal ehwal pengguna;
- (f) seorang wakil Menteri yang dipertanggungjawabkan dengan tanggungjawab bagi pertanian dan industri asas tani;
- (g) seorang wakil Menteri yang dipertanggungjawabkan dengan tanggungjawab bagi sumber manusia;
- (h) seorang wakil Menteri yang dipertanggungjawabkan dengan tanggungjawab bagi pengangkutan;
- (i) seorang wakil Menteri yang dipertanggungjawabkan dengan tanggungjawab bagi perumahan dan kerajaan tempatan;
- (j) seorang wakil Menteri yang dipertanggungjawabkan dengan tanggungjawab bagi tenaga, teknologi hijau dan air;

- (k) seorang wakil Menteri yang dipertanggungjawabkan dengan tanggungjawab bagi kesihatan;
 - (l) seorang anggota bagi masing-masing Sabah dan Sarawak, yang hendaklah dilantik oleh Menteri selepas berunding dengan Kerajaan Negeri Sabah dan Sarawak;
 - (m) seorang anggota yang hendaklah dilantik oleh Menteri daripada kalangan orang yang terlibat dalam industri petroleum;
 - (n) seorang anggota yang hendaklah dilantik oleh Menteri daripada pencalonan oleh industri kelapa sawit;
 - (o) seorang anggota yang hendaklah dilantik oleh Menteri daripada pencalonan oleh Persekutuan Pengilang Malaysia atau mana-mana orang yang terlibat dalam pembuatan;
 - (p) seorang anggota yang hendaklah dilantik oleh Menteri daripada pencalonan oleh industri getah;
 - (q) seorang anggota yang hendaklah dilantik oleh Menteri daripada kalangan kakitangan akademik institusi pengajian tinggi; dan
 - (r) dua orang anggota yang hendaklah dilantik oleh Menteri daripada kalangan organisasi bukan kerajaan yang aktif dalam menggalakkan dan mempertingkatkan kualiti alam sekeliling.”; dan
- (b) dalam subseksyen (3), dengan menggantikan perkataan “(2)(f), (g), (gg), (h), (hh), (i) dan (j)” dengan perkataan “(2)(l), (m), (n), (o), (p), (q) dan (r)”.

Pindaan seksyen 33A

5. Seksyen 33A Akta ibu dipinda dengan menggantikan subseksyen (2) dengan subseksyen yang berikut:

“(2) Bagi maksud menjalankan audit alam sekeliling dan mengemukakan laporan mengenainya—

- (a) Ketua Pengarah boleh melantik orang yang layak; atau

- (b) Ketua Pengarah boleh meminta pemunya atau penghuni untuk melantik orang yang layak daripada kalangan orang yang layak yang disenaraikan di bawah subseksyen (3).”.

Pindaan seksyen 34A

6. Seksyen 34A Akta ibu dipinda—

- (a) dengan menggantikan subseksyen (2) dengan subseksyen yang berikut:

“(2) Mana-mana orang yang berhasrat untuk menjalankan apa-apa aktiviti yang ditetapkan hendaklah melantik orang yang layak untuk menjalankan penilaian kesan kepada alam sekeliling dan untuk mengemukakan laporan mengenainya kepada Ketua Pengarah mengikut cara sebagaimana yang ditetapkan oleh Ketua Pengarah.”;

- (b) dengan memasukkan selepas subseksyen (2) subseksyen yang berikut:

“(2A) Ketua Pengarah hendaklah menyenggara suatu senarai orang yang layak yang boleh menjalankan penilaian kesan kepada alam sekeliling dan mengemukakan laporan mengenainya.

(2B) Orang yang layak yang mengemukakan laporan itu hendaklah—

- (a) bertanggungjawab bagi penilaian kesan kepada alam sekeliling dan syor penilaian kesan kepada alam sekeliling;
- (b) memastikan bahawa laporan dan syor itu tidak mengandungi apa-apa maklumat yang palsu atau mengelirukan;
- (c) mengambil insurans indemniti profesional bagi apa-apa liabiliti yang berbangkit daripada penilaian kesan kepada alam sekeliling dan syor penilaian kesan kepada alam sekeliling.

(2c) Laporan itu hendaklah mengikut garis panduan sebagaimana yang ditetapkan oleh Ketua Pengarah dan hendaklah mengandungi—

- (a) penilaian mengenai kesan yang aktiviti itu akan ada atau mungkin ada ke atas alam sekeliling; dan
- (b) langkah-langkah yang dicadangkan yang hendaklah diambil untuk menghalang, mengurangkan atau mengawal kesan buruk ke atas alam sekeliling.”;
- (c) dalam subseksyen (3), dengan menggantikan perkataan “(2)” dengan perkataan “(2c)”;
- (d) dengan menggantikan subseksyen (4) dan (5) dengan subseksyen yang berikut:

“(4) Jika Ketua Pengarah, apabila meneliti laporan itu dan selepas membuat apa-apa penyiasatan sebagaimana yang difikirkannya perlu, berpendapat bahawa—

- (a) laporan itu tidak mengikut rancangan pemajuan atau rancangan fizikal yang diluluskan oleh pihak berkuasa yang meluluskan yang berkaitan; atau
- (b) laporan itu tidak memenuhi kehendak di bawah subseksyen (2c),

dia tidak boleh meluluskan laporan itu, dengan memberikan alasan untuk tidak meluluskan, dan hendaklah memaklumkan orang itu dan pihak berkuasa yang meluluskan yang berkaitan dengan sewajarnya.

(5) Ketua Pengarah boleh menghendaki orang itu untuk mengemukakan apa-apa laporan lain kepadanya, sebagai tambahan kepada laporan yang dikehendaki supaya

dikemukakan di bawah subseksyen 34A(2), yang berhubungan dengan kesan alam sekeliling untuk kelulusannya.”; dan

(e) dalam subseksyen (8), dengan menggantikan perkataan “satu ratus ribu ringgit” dengan perkataan “lima ratus ribu ringgit”.

Seksyen baru 34AA

7. Akta ibu dipinda dengan memasukkan selepas seksyen 34A seksyen yang berikut:

“Perintah larangan bagi aktiviti yang ditetapkan

34AA. (1) Ketua Pengarah boleh mengeluarkan perintah larangan atau perintah berhenti kerja kepada orang yang menjalankan aktiviti yang ditetapkan—

- (a) tanpa kelulusan di bawah subseksyen 34A(3);
- (b) yang mencabuli apa-apa syarat yang dilampirkan pada kelulusan laporan itu; atau
- (c) yang pada pendapat Ketua Pengarah adalah dijalankan mengikut cara yang mungkin menyebabkan kerosakan alam sekeliling.

(2) Perintah larangan atau perintah berhenti kerja itu boleh dikeluarkan bagi maksud menghalang aktiviti yang ditetapkan daripada berterusan—

- (a) sama ada secara mutlak atau bersyarat;
- (b) bagi apa-apa tempoh sebagaimana yang ditentukan oleh Ketua Pengarah; atau
- (c) sehingga kehendak untuk meremеди sebagaimana yang diarahkan oleh Ketua Pengarah telah dipatuhi.

(3) Mana-mana orang yang melanggar seksyen ini melakukan suatu kesalahan dan boleh dikenakan—

(a) denda tidak lebih daripada lima ratus ribu ringgit atau penjara selama tempoh tidak lebih daripada lima tahun atau kedua-duanya; dan

(b) bagi kesalahan yang berterusan, denda tidak lebih daripada satu ribu ringgit bagi tiap-tiap hari kesalahan itu berterusan selepas suatu notis telah disampaikan oleh Ketua Pengarah ke atas orang itu menghendaki orang itu supaya mematuhi perbuatan yang dinyatakan dalamnya.”.

Pindaan seksyen 36c

8. Subseksyen 36c(2) Akta ibu dipinda—

(a) dengan memotong perkataan “dan” di hujung perenggan (b);

(b) dengan menggantikan noktah di hujung perenggan (c) dengan perkataan “; dan”; dan

(c) dengan memasukkan selepas perenggan (c) perenggan yang berikut:

“(d) dua anggota Majlis yang dilantik oleh Menteri.”.

Pindaan seksyen 36d

9. Perenggan 36D(a) Akta ibu dipinda dengan memasukkan selepas perkataan “minyak” perkataan “atau gas”.

Pindaan seksyen 36E

10. Perenggan 36E(a) Akta ibu dipinda dengan memasukkan selepas perkataan “penyelidikan” perkataan “kajian, audit alam sekeliling atau apa-apa aktiviti sebagaimana yang difikirkan patut oleh Menteri”.

Seksyen baru 37A, 37B dan 37C

11. Akta ibu dipinda dengan memasukkan selepas seksyen 37 seksyen yang berikut:

“Kuasa penyiataan

37A. (1) Ketua Pengarah atau mana-mana pegawai yang diberi kuasa secara bertulis oleh Ketua Pengarah hendaklah mempunyai semua kuasa yang perlu untuk menjalankan penyiataan di bawah Akta ini.

(2) Dalam mana-mana hal yang berhubungan dengan pelakuan sesuatu kesalahan di bawah Akta ini, Ketua Pengarah atau mana-mana pegawai yang diberi kuasa secara bertulis oleh Ketua Pengarah yang menjalankan penyiataan boleh menjalankan semua atau mana-mana kuasa berhubungan dengan penyiataan polis dalam kes boleh tangkap yang diberikan oleh Kanun Tatacara Jenayah [*Akta 593*].

Kad kuasa

37B. (1) Maka hendaklah dikeluarkan kepada Ketua Pengarah atau mana-mana pegawai yang diberi kuasa secara bertulis oleh Ketua Pengarah suatu kad kuasa yang hendaklah ditandatangani oleh Menteri.

(2) Bila mana Ketua Pengarah atau mana-mana pegawai yang diberi kuasa secara bertulis oleh Ketua Pengarah menjalankan mana-mana kuasa penguatkuasaan di bawah Akta ini, dia hendaklah, apabila diminta, mengemukakan kepada orang yang terhadapnya kuasa itu sedang dijalankan kad kuasa yang dikeluarkan kepadanya di bawah subseksyen (1).

Kuasa penangkapan

37C. (1) Ketua Pengarah atau mana-mana pegawai yang diberi kuasa secara bertulis oleh Ketua Pengarah boleh menangkap tanpa waran mana-mana orang yang dipercayainya dengan munasabah telah melakukan atau cuba untuk melakukan suatu kesalahan di bawah Akta ini.

(2) Ketua Pengarah atau mana-mana pegawai yang diberi kuasa secara bertulis oleh Ketua Pengarah yang membuat penangkapan di bawah subseksyen (1) hendaklah, tanpa kelengahan yang tidak perlu, membawa orang yang ditangkap itu ke balai polis yang paling hampir, dan sesudah itu orang itu hendaklah diperlakukan mengikut undang-undang yang berhubungan dengan tatacara jenayah yang sedang berkuat kuasa.”.

Seksyen baru 38AA dan 38AB

12. Akta ibu dipinda dengan memasukkan selepas seksyen 38A seksyen yang berikut:

“Kebolehterimaan pernyataan dalam keterangan

38AA. (1) Kecuali sebagaimana yang diperuntukkan dalam seksyen ini, tiada pernyataan yang dibuat oleh mana-mana orang kepada Ketua Pengarah atau mana-mana pegawai yang diberi kuasa secara bertulis oleh Ketua Pengarah semasa penyiasatan yang dibuat di bawah Akta ini boleh digunakan sebagai keterangan.

(2) Apabila mana-mana saksi dipanggil bagi pendakwaan atau bagi pembelaan, selain tertuduh, mahkamah hendaklah, atas permintaan tertuduh atau pendakwa, merujuk kepada mana-mana pernyataan yang dibuat oleh saksi itu kepada Ketua Pengarah atau mana-mana pegawai yang diberi kuasa secara bertulis oleh Ketua Pengarah semasa sesuatu penyiasatan di bawah Akta ini dan boleh kemudiannya, jika mahkamah berpendapat patut demi kepentingan keadilan, mengarahkan supaya tertuduh diberikan suatu salinan pernyataan itu dan pernyataan itu boleh digunakan untuk mencabar kebolehpercayaan saksi itu mengikut cara yang diperuntukkan oleh Akta Keterangan 1950 [*Akta 56*].

(3) Jika tertuduh telah membuat suatu pernyataan semasa sesuatu penyiasatan, pernyataan itu boleh diterima sebagai keterangan bagi menyokong pembelaannya semasa perbicaraan.

(4) Tiada apa-apa jua dalam seksyen ini boleh disifatkan terpakai bagi mana-mana pernyataan yang dibuat semasa suatu kawad cam atau terangkum dalam seksyen 27 atau perenggan 32(1)(a), (i) dan (j) Akta Keterangan 1950.

(5) Apabila mana-mana orang dipertuduh atas apa-apa kesalahan berhubung dengan pembuatan atau kandungan apa-apa pernyataan yang dibuat olehnya kepada Ketua Pengarah atau mana-mana pegawai yang diberi kuasa secara bertulis oleh Ketua Pengarah semasa sesuatu penyiasatan yang dibuat di bawah Akta ini, pernyataan itu boleh digunakan sebagai keterangan dalam kes pendakwaan.

Kuasa untuk menghendaki kehadiran orang yang mengetahui kes

38AB. (1) Ketua Pengarah atau mana-mana pegawai yang diberi kuasa secara bertulis oleh Ketua Pengarah yang membuat penyiasatan di bawah Akta ini boleh, melalui perintah secara bertulis, menghendaki mana-mana orang yang pada hemat Ketua Pengarah atau mana-mana pegawai yang diberi kuasa secara bertulis oleh Ketua Pengarah mengetahui fakta dan hal keadaan kes itu supaya hadir di hadapannya, dan orang itu hendaklah hadir sebagaimana yang dikehendaki.

(2) Jika mana-mana orang sedemikian enggan atau tidak hadir sebagaimana yang dikehendaki oleh suatu perintah yang dibuat di bawah subseksyen (1), Ketua Pengarah atau mana-mana pegawai yang diberi kuasa secara bertulis oleh Ketua Pengarah itu boleh melaporkan keengganan atau ketidakhadiran itu kepada Hakim Mahkamah Sesyen yang hendaklah mengeluarkan suatu waran untuk memastikan kehadiran orang itu sebagaimana yang dikehendaki oleh perintah itu.”.

Penggantian seksyen 46B

13. Akta ibu dipinda dengan menggantikan seksyen 46B dengan seksyen yang berikut:

“Pelucuthakan kenderaan, kapal, buku, dsb., yang disita

46B. (1) Mana-mana kenderaan, kapal, buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau dokumen lain yang disita pada menjalankan mana-mana kuasa yang diberikan di bawah Akta ini boleh dilucuthakkan.

(2) Suatu perintah bagi pelucuthakan kenderaan, kapal, buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau dokumen lain hendaklah dibuat jika dibuktikan sehingga memuaskan hati mahkamah bahawa suatu kesalahan di bawah Akta ini telah dilakukan dan bahawa kenderaan, kapal, buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau dokumen lain itu merupakan hal perkara bagi atau digunakan dalam pelakuan kesalahan itu, walaupun tiada orang telah disabitkan atas kesalahan itu.

(3) Jika tiada pendakwaan berkenaan dengan mana-mana kenderaan, kapal, buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau dokumen lain yang disita di bawah Akta ini, kenderaan, kapal, buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau dokumen lain itu hendaklah diambil dan disifatkan terlucut hak apabila tamat tempoh satu bulan kalendar dari tarikh penyampaian notis.

(4) Notis yang disebut dalam subseksyen (3) hendaklah menunjukkan bahawa—

- (a) tiada pendakwaan berkenaan dengan kenderaan, kapal, buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau apa-apa dokumen lain itu;
- (b) kenderaan, kapal, buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau dokumen lain itu, hendaklah diambil dan disifatkan terlucut hak apabila tamat tempoh satu bulan kalendar dari tarikh penyampaian notis itu melainkan jika sebelum tarikh itu suatu tuntutan baginya telah dibuat mengikut cara yang dinyatakan dalam subseksyen (5), (6) dan (7).

(5) Mana-mana orang yang menegaskan bahawa dia ialah pemunya kenderaan, kapal, buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau dokumen lain itu yang disebut dalam subseksyen (3) dan bahawa kenderaan, kapal, buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau dokumen lain itu tidak boleh dilucuthakkan boleh dengan sendiri atau melalui ejennya yang diberi kuasa secara bertulis, memberikan notis bertulis kepada Ketua Pengarah atau mana-mana pegawai yang diberi kuasa secara bertulis oleh Ketua Pengarah yang dalam milikannya kenderaan, kapal, buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau dokumen lain itu dipegang bahawa dia menuntut kenderaan, kapal, buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau dokumen lain itu.

(6) Apabila notis yang disebut dalam subseksyen (4) diterima, Ketua Pengarah atau mana-mana pegawai yang diberi kuasa secara bertulis oleh Ketua Pengarah hendaklah merujuk tuntutan itu kepada Hakim Mahkamah Sesyen.

(7) Hakim Mahkamah Sesyen yang kepadanya sesuatu perkara dirujuk di bawah subseksyen (6) hendaklah mengeluarkan suatu saman yang menghendaki orang yang menegaskan bahawa dia ialah pemunya kenderaan, kapal, buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau dokumen lain itu dan orang yang daripadanya ia disita hadir di hadapannya, dan apabila mereka hadir atau tidak hadir, setelah dibuktikan bahawa saman itu telah disampaikan dengan sewajarnya, Hakim Mahkamah Sesyen hendaklah meneruskan pemeriksaan perkara itu.

(8) Jika dibuktikan bahawa suatu kesalahan di bawah Akta ini telah dilakukan dan bahawa kenderaan, kapal, buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling,

bahan cemar, lesen, permit, perakuan, atau dokumen lain yang disebut dalam subseksyen (7) merupakan hal perkara bagi atau telah digunakan dalam pelakuan kesalahan itu, Hakim Mahkamah Sesyen itu hendaklah memerintahkan supaya kenderaan, kapal, buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau dokumen lain itu dilucuthakkan, dan hendaklah, jika tiada bukti sedemikian, memerintahkan pelepasannya.

(9) Mana-mana kenderaan, kapal, buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau dokumen lain yang dilucuthakkan atau disifatkan terlucut hak hendaklah dilupuskan—

- (a) mengikut arahan yang diberikan oleh Hakim Mahkamah Sesyen; atau
- (b) mengikut cara sebagaimana yang difikirkan patut oleh Ketua Pengarah atau mana-mana pegawai yang diberi kuasa secara bertulis oleh Ketua Pengarah.”.

Seksyen baru 46BA, 46BB dan 46BC

14. Akta ibu dipinda dengan memasukkan selepas seksyen 46B seksyen yang berikut:

“Senarai kenderaan, kapal, buku, dsb., yang disita

46BA. (1) Jika apa-apa penyitaan dibuat di bawah Akta ini, seseorang Ketua Pengarah atau mana-mana pegawai yang diberi kuasa secara bertulis oleh Ketua Pengarah yang membuat penyitaan itu hendaklah menyediakan senarai kenderaan, kapal, buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau dokumen lain yang disita dan hendaklah menandatangani senarai itu.

(2) Senarai yang disediakan mengikut subseksyen (1) hendaklah diserahkan dengan serta-merta kepada orang yang mengawal atau bertanggungjawab bagi kenderaan, kapal, kapal terbang atau premis itu jika penyitaan dibuat di bawah seksyen 38 atau 46A, mengikut mana-mana yang berkenaan.

Pelepasan buku, rekod, komputer, dsb., yang disita

46BB. (1) Jika mana-mana buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau apa-apa dokumen lain telah disita di bawah Akta ini, Ketua Pengarah atau mana-mana pegawai yang diberi kuasa secara bertulis oleh Ketua Pengarah yang membuat penyitaan itu boleh, selepas merujuk kepada Pendakwa Raya, melepaskan buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau dokumen lain kepada orang yang daripada milikan, jagaan atau kawalannya ia disita.

(2) Suatu rekod secara bertulis hendaklah dibuat oleh Ketua Pengarah atau mana-mana pegawai yang diberi kuasa secara bertulis oleh Ketua Pengarah yang membuat pelepasan buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau dokumen lain di bawah subseksyen (1) yang menyatakan secara terperinci hal keadaan dan sebab bagi pelepasan itu, dan dia hendaklah menghantarkan satu salinan rekod itu kepada Pendakwa Raya dalam masa tujuh hari dari pelepasan itu.

Kos memegang kenderaan, kapal, buku, dsb., yang disita

46BC. Jika mana-mana kenderaan, kapal, buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau dokumen lain yang disita di bawah Akta ini dipegang dalam jagaan Ketua Pengarah atau mana-mana pegawai yang diberi kuasa secara bertulis

oleh Ketua Pengarah sementara menunggu penyelesaian apa-apa prosiding berkenaan dengan suatu kesalahan di bawah Akta ini, kos bagi memegangnya dalam jagaan hendaklah, sekiranya mana-mana orang disabitkan atas kesalahan itu, menjadi hutang yang kena dibayar kepada Kerajaan oleh orang itu dan bolehlah didapatkan dengan sewajarnya.”.

Pemotongan seksyen 46c

15. Akta ibu dipinda dengan memotong seksyen 46c.

Penggantian seksyen 46D

16. Akta ibu dipinda dengan menggantikan seksyen 46D dengan seksyen yang berikut:

“Tiada kos atau ganti rugi yang berbangkit daripada penyitaan boleh didapatkan

46D. Tiada seorang pun boleh, dalam apa-apa prosiding di hadapan mana-mana mahkamah berkenaan dengan penyitaan mana-mana kenderaan, kapal, buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau dokumen lain yang disita pada menjalankan atau yang berupa sebagai perjalanan mana-mana kuasa yang diberikan di bawah Akta ini, berhak mendapat kos prosiding itu atau apa-apa ganti rugi atau relief lain melainkan jika penyitaan itu dibuat tanpa sebab yang munasabah.”.

Seksyen baru 48AA hingga 48AE

17. Akta ibu dipinda dengan memasukkan selepas seksyen 48A seksyen yang berikut:

“Akses kepada data berkomputer

48AA. (1) Ketua Pengarah atau mana-mana pegawai yang diberi kuasa secara bertulis oleh Ketua Pengarah yang

menjalankan penggeledahan di bawah Akta ini hendaklah diberi akses kepada data berkomputer sama ada yang disimpan dalam suatu komputer atau selainnya.

(2) Bagi maksud seksyen ini, Ketua Pengarah atau mana-mana pegawai yang diberi kuasa secara bertulis oleh Ketua Pengarah hendaklah diberikan kata laluan, kod penyulitan, kod penyahsulitan, perisian atau perkakasan yang perlu dan apa-apa cara lain yang diperlukan untuk membolehkan data berkomputer difahami.

Anggapan

48AB. (1) Jika apa-apa bahan yang disyaki sebagai buangan terjadual dan bahan itu terkandung dalam beberapa bekas, adalah mencukupi untuk menganalisis sampel bahan itu bagi amaun sebagaimana yang ditentukan oleh Ketua Pengarah dan jika analisis itu membuktikan bahawa kesemua sampel itu daripada sifat dan perihalan yang sama, adalah dianggap sehingga dibuktikan sebaliknya, bahawa kandungan semua bekas itu adalah daripada sifat dan perihalan yang sama sebagaimana sampel itu dianalisis.

(2) Bahan yang dirujuk dalam subseksyen (1) hendaklah, sehingga dibuktikan sebaliknya, disifatkan sebagai buangan terjadual dan hendaklah dilupuskan mengikut cara sebagaimana yang difikirkan patut oleh Menteri.

(3) Tatacara mengambil dan berurusan dengan sampel hendaklah sebagaimana yang ditetapkan oleh peraturan-peraturan.

Kuasa tambahan

48AC. Ketua Pengarah atau mana-mana pegawai yang diberi kuasa secara bertulis oleh Ketua Pengarah hendaklah, bagi maksud melaksanakan Akta ini, mempunyai kuasa untuk melakukan semua atau mana-mana yang berikut:

- (a) untuk menghendaki pengemukaan apa-apa buku, rekod, komputer, loji perindustrian, kelengkapan, buangan terjadual, buangan, bahan berbahaya

kepada alam sekeliling, bahan cemar, lesen, permit, perakuan, atau dokumen lain yang disimpan oleh mana-mana orang dan untuk meneliti, memeriksa, memuat turun, membuat salinan atau mengambil cabutan daripadanya;

- (b) untuk menghendaki pengemukaan apa-apa dokumen pengenalan daripada mana-mana orang berhubung dengan apa-apa perbuatan atau kesalahan di bawah Akta ini;
- (c) untuk membuat apa-apa siasatan yang perlu untuk menentukan sama ada peruntukan Akta ini telah dipatuhi.

Menghalang penggeledahan

48AD. Mana-mana orang yang—

- (a) enggan memberikan Ketua Pengarah atau mana-mana pegawai yang diberi kuasa secara bertulis oleh Ketua Pengarah akses kepada mana-mana kenderaan, kapal, kapal terbang atau premis yang Ketua Pengarah atau mana-mana pegawai yang diberi kuasa secara bertulis oleh Ketua Pengarah berhak untuk mempunyai di bawah Akta ini atau dalam pelaksanaan apa-apa kewajipan yang dikenakan atau kuasa yang diberikan oleh Akta ini;
- (b) mengamang, menghalang, menyekat atau mengganggu Ketua Pengarah atau mana-mana pegawai yang diberi kuasa secara bertulis oleh Ketua Pengarah dalam pelaksanaan kuasanya di bawah Akta ini; atau
- (c) enggan memberikan Ketua Pengarah atau mana-mana pegawai yang diberi kuasa secara bertulis oleh Ketua Pengarah apa-apa maklumat yang berhubung dengan kesalahan atau kesalahan yang disyaki di bawah Akta ini atau apa-apa maklumat lain yang boleh semunasabahnya dikehendaki olehnya dan yang ada dalam pengetahuannya atau kuasa untuk memberikannya,

melakukan suatu kesalahan dan boleh dikenakan denda tidak lebih daripada sepuluh ribu ringgit atau penjara selama tempoh tidak lebih daripada dua tahun atau kedua-duanya.

Pencantuman kesalahan

48AE. Walau apa pun seksyen 164 Kanun Tatacara Jenayah, jika seseorang dituduh melakukan lebih daripada satu kesalahan di bawah Akta ini, orang itu boleh dipertuduh dan dibicarakan dalam satu perbicaraan atas apa-apa bilangan kesalahan itu yang dilakukakan dalam apa-apa tempoh masa.”.

Pindaan seksyen 49

18. Seksyen 49 Akta ibu dipinda—

- (a) dalam subseksyen (1), dengan memasukkan selepas perkataan “pihak berkuasa” perkataan “, apa-apa perbadanan”; dan
- (b) dalam subseksyen (2)—
 - (i) dengan memasukkan selepas perkataan “apa-apa pihak berkuasa tempatan” perkataan “, kepada mana-mana perbadanan”; dan
 - (ii) dengan memasukkan selepas perkataan “atau pihak berkuasa tempatan” perkataan “atau perbadanan”.

Seksyen baru 49A dan 49B

19. Akta ibu dipinda dengan memasukkan selepas seksyen 49 seksyen yang berikut:

“Orang yang berwibawa

49A. (1) Seseorang pemunya atau penghuni premis hendaklah mengambil kerja seseorang yang telah diperakukan oleh Ketua Pengarah sebagai orang yang berwibawa untuk menjalankan semua atau mana-mana aktiviti yang berikut:

- (a) pengendalian kelengkapan kawalan;
- (b) pengurusan buangan terjadual;
- (c) menjalankan kajian;

(d) penyediaan dan pengemukaan laporan, pelan, cadangan, lukisan kejuruteraan atau dokumen lain yang berhubungan dengan perkara alam sekeliling.

(2) Laporan, pelan, cadangan, lukisan kejuruteraan atau dokumen lain yang berhubungan dengan perkara alam sekeliling yang disebut dalam perenggan (1)(d) hendaklah disediakan dan dikemukakan oleh orang yang berwajib kepada Ketua Pengarah.

Ganjaran kepada pemberi maklumat

49B. Ketua Pengarah boleh memerintahkan supaya ganjaran sebagaimana yang difikirkannya patut dibayar kepada pemberi maklumat bagi perkhidmatan, maklumat, pernyataan atau bantuan berkenaan dengan pengesanan apa-apa kesalahan di bawah Akta ini.”.

Seksyen baru 50A

20. Akta ibu dipinda dengan memasukkan selepas seksyen 50 seksyen yang berikut:

“Perlindungan pemberi maklumat

50A. (1) Kecuali sebagaimana yang diperuntukkan dalam subseksyen (2) dan (3), tiada saksi dalam mana-mana prosiding sivil atau jenayah menurut Akta ini boleh dikehendaki atau dibenarkan untuk menzahirkan nama atau alamat mana-mana pemberi maklumat atau isi dan jenis maklumat yang diterima daripadanya atau menyatakan apa-apa perkara yang mungkin menyebabkan dia diketahui.

(2) Jika mana-mana buku, rekod, dokumen atau kertas yang menjadi keterangan atau yang boleh diperiksa dalam mana-mana jua prosiding sivil atau jenayah mengandungi apa-apa entri yang menamakan atau memerihalkan mana-mana pemberi maklumat atau yang mungkin menyebabkan

dia diketahui, mahkamah hendaklah menyebabkan semua entri sedemikian ditutup daripada penglihatan atau dipadamkan setakat yang perlu untuk melindungi pemberi maklumat itu daripada diketahui.

(3) Jika dalam sesuatu perbicaraan bagi mana-mana kesalahan di bawah Akta ini mahkamah, selepas siasatan penuh tentang kes itu, berpendapat bahawa pemberi maklumat itu dengan sengaja membuat dalam aduannya suatu pernyataan material yang dia tahu atau percaya adalah palsu atau tidak percaya adalah benar, atau jika dalam mana-mana prosiding lain mahkamah berpendapat bahawa keadilan tidak dapat dilaksanakan sepenuhnya antara pihak-pihak dalam prosiding itu tanpa pemberi maklumat itu diketahui, mahkamah boleh menghendaki pengemukaan aduan asal, jika bertulis, dan membenarkan siasatan dan menghendaki penzahiran sepenuhnya tentang pemberi maklumat itu.

(4) Mana-mana orang yang memberikan maklumat yang disebut dalam seksyen ini mengetahui bahawa maklumat itu adalah palsu, melakukan suatu kesalahan.”.

Pindaan seksyen 51

21. Seksyen 51 Akta ibu dipinda—

(a) dalam subseksyen (1)—

(i) dalam teks bahasa kebangsaan, dengan menggantikan perenggan (*t*) dengan perenggan yang berikut:

“(*t*) mengawal audit alam sekeliling dan pengemukaan suatu laporan audit dan pelantikan orang yang layak untuk membantu Ketua Pengarah dalam menjalankan audit alam sekeliling bagi mana-mana kenderaan, kapal atau premis, tanpa mengira sama ada kenderaan, kapal atau premis itu adalah yang ditetapkan

di bawah seksyen 18 atau selainnya, dan cara pengendaliannya, dan menetapkan bayaran yang boleh dikenakan;”;

(ii) dengan memasukkan selepas perenggan (t) perenggan yang berikut:

“(tt) mengawal selia apa-apa perkara yang berhubungan dengan penilaian kesan kepada alam sekeliling;”;

(iii) dengan menggantikan perenggan (w) dengan perenggan yang berikut:

“(w) mengawal selia apa-apa perkara yang berhubungan dengan orang yang berwibawa;”;

(iv) dengan memasukkan selepas perenggan (w) perenggan yang berikut:

“(x) mengawal selia kecekapan penyedia latihan yang menyediakan latihan dalam lapangan alam sekeliling;”;

(b) dengan memasukkan selepas subseksyen (2) subseksyen yang berikut:

“(3) Peraturan-peraturan yang dibuat di bawah subseksyen (1) boleh menetapkan apa-apa perbuatan yang melanggar peraturan-peraturan sebagai suatu kesalahan dan boleh menetapkan penalti denda tidak melebihi satu ratus ribu ringgit atau pemenjaraan selama tempoh tidak melebihi dua tahun atau kedua-duanya.”.

Peruntukan kecualian dan peralihan

22. (1) Anggota Majlis yang telah dilantik atau dilantik semula sebelum permulaan kuat kuasa Akta ini dan yang belum menamatkan tempoh jawatannya sebaik sebelum permulaan kuat kuasa Akta ini boleh terus memegang jawatan bagi baki tempoh jawatannya.

(2) Apa-apa tindakan atau perintah yang belum selesai yang berhubungan dengan apa-apa kenderaan atau kapal sebelum tarikh permulaan kuat kuasa Akta ini tidak terjejas oleh Akta ini dan hendaklah diteruskan seolah-olah Akta ini tidak diperbuat.

HURAIAN

Rang Undang-Undang ini bertujuan untuk meminda Akta Kualiti Alam Sekeliling 1974 (“Akta 127”).

2. *Fasal 1* mengandungi tajuk ringkas dan kuasa Menteri untuk menetapkan tarikh permulaan kuat kuasa Akta yang dicadangkan.

3. *Fasal 2* bertujuan untuk mengadakan peruntukan bagi pindaan am kepada Akta 127 dengan menggantikan perkataan “kakitangan yang layak” di mana-mana jua ia terdapat dengan perkataan “orang yang layak”.

4. *Fasal 3* bertujuan untuk meminda seksyen 2 Akta 127 untuk memasukkan takrif baru “orang yang berwibawa”, “rancangan pemajuan”, “rancangan fizikal”, “pencemaran” dan “orang yang layak”.

5. *Fasal 4* bertujuan untuk meminda seksyen 4 Akta 127 berkenaan keanggotaan Majlis. Pindaan ini berbangkit daripada pembentukan Kementerian baru dan perubahan dalam nama sesetengah Kementerian. Selanjutnya, dengan pindaan ini, anggota baru Majlis hendaklah termasuk orang daripada organisasi bukan kerajaan yang berdaftar yang aktif dalam menggalakkan dan mempertingkatkan kualiti alam sekeliling.

6. *Fasal 5* bertujuan untuk meminda seksyen 33A Akta 127 untuk membolehkan Ketua Pengarah untuk melantik orang yang layak dan untuk meminta pemunya atau penghuni untuk melantik orang yang layak daripada kalangan orang yang layak yang disenaraikan di bawah subseksyen 33A(3) Akta 127 bagi maksud menjalankan audit alam sekeliling dan untuk mengemukakan laporan mengenainya.

7. *Fasal 6* bertujuan untuk meminda seksyen 34A Akta 127 untuk mengadakan peruntukan bagi mana-mana orang yang berhasrat untuk menjalankan apa-apa aktiviti yang ditetapkan untuk melantik orang yang layak untuk menjalankan penilaian kesan kepada alam sekeliling dan untuk mengemukakan laporan mengenainya kepada Ketua Pengarah. Laporan itu hendaklah mematuhi garis panduan yang ditetapkan oleh Ketua Pengarah dan hendaklah mengandungi penilaian mengenai kesan aktiviti itu terhadap alam sekeliling serta juga langkah yang dicadangkan untuk menghalang, mengurangkan atau mengawal kesan buruk ke atas alam sekeliling.

Ketua Pengarah boleh tidak meluluskan laporan itu jika laporan itu tidak mengikut rancangan pemajuan atau rancangan fizikal yang diluluskan oleh pihak berkuasa yang meluluskan yang berkaitan atau jika laporan itu tidak mematuhi kehendak sebagaimana yang dinyatakan di atas.

8. *Fasal 7* bertujuan untuk memasukkan seksyen baru 34^{AA} ke dalam Akta 127 untuk memperuntukkan kuasa kepada Ketua Pengarah untuk mengeluarkan perintah larangan atau perintah berhenti kerja kepada orang yang menjalankan aktiviti yang ditetapkan tanpa kelulusan di bawah subseksyen 34^{A(3)} Akta 127, yang mencabuli syarat-syarat yang dilampirkan pada laporan itu atau jika Ketua Pengarah berpendapat bahawa aktiviti yang ditetapkan itu boleh menyebabkan kerosakan alam sekeliling.

9. *Fasal 8* bertujuan untuk meminda subseksyen 36^{C(2)} Akta 127 untuk memasukkan dua anggota Majlis, yang dilantik oleh Menteri, untuk menganggotai Jawatankuasa Tabung Alam Sekeliling.

10. *Fasal 9* bertujuan untuk meminda perenggan 36^{D(a)} Akta 127 untuk menghendaki orang yang terlibat dalam penjelajahan, pengekstrakan, penapisan, pengeluaran, pergerakan besar-besaran, pengedaran atau penyimpanan gas supaya menyumbang kepada Tabung.

11. *Fasal 10* bertujuan untuk meminda perenggan 36^{E(a)} Akta 127 untuk meluaskan pentadbiran Tabung bagi maksud yang merangkumi kajian, audit alam sekeliling atau apa-apa aktiviti sebagaimana yang difikirkan patut oleh Menteri.

12. *Fasal 11* bertujuan untuk memasukkan seksyen baru 37^A hingga 37^C bagi maksud memperuntukkan Ketua Pengarah atau mana-mana pegawai yang diberi kuasa secara bertulis oleh Ketua Pengarah kuasa penyiasatan dan kuasa penangkapan. Kad kuasa juga hendaklah dikeluarkan kepada Ketua Pengarah atau mana-mana pegawai yang diberi kuasa secara bertulis oleh Ketua Pengarah dan pada menjalankan kuasa penguatkuasaan mereka di bawah Akta 127, mereka wajib untuk menunjukkan kad kuasa apabila diminta kepada orang yang terhadapnya kuasa itu sedang dijalankan.

13. *Fasal 12* bertujuan untuk memasukkan seksyen baru 38^{AA} dan 38^{AB} untuk mengadakan peruntukan bagi kebolehterimaan pernyataan dalam keterangan dan peruntukan untuk membolehkan Ketua Pengarah atau mana-mana pegawai yang diberi kuasa secara bertulis oleh Ketua Pengarah untuk menghendaki kehadiran mana-mana orang yang mengetahui fakta dan hal keadaan kes itu.

14. *Fasal 13* bertujuan untuk menggantikan seksyen 46^B Akta 127 yang sedia ada dengan seksyen 46^B yang baru. Seksyen baru yang dicadangkan ini memperkatakan peruntukan yang berhubungan dengan pelucuthakan apa-apa yang disita di bawah Akta 127.

15. *Fasal 14* bertujuan untuk memasukkan seksyen baru 46^{BA} hingga 46^{BC}. Seksyen 46^{BA} yang dicadangkan mengenakan kewajipan ke atas Ketua Pengarah atau mana-mana pegawai yang diberi kuasa secara bertulis oleh

Ketua Pengarah untuk menyediakan senarai kenderaan, kapal, buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau dokumen lain yang disita di bawah Akta 127.

Seksyen 46BB yang dicadangkan memperkatakan pelepasan apa-apa yang disita di bawah Akta 127.

Selanjutnya, seksyen 46BC yang dicadangkan bertujuan untuk memperuntukkan bahawa kos memegang apa-apa yang disita di bawah Akta 127 hendaklah menjadi hutang kepada Kerajaan dan boleh didapatkan sewajarnya jika seseorang disabitkan atas suatu kesalahan di bawah Akta ini.

16. *Fasal 15* bertujuan untuk memotong seksyen 46c. Pemotongan ini berbangkit daripada kemasukan seksyen baru 46b yang merangkumi peruntukan yang berhubungan dengan pelucuthakan.

17. *Fasal 16* bertujuan untuk menggantikan seksyen 46D Akta 127 yang sedia ada dengan seksyen 46D yang baru untuk mengadakan peruntukan bahawa tiada seorang pun boleh, dalam mana-mana prosiding berkenaan dengan penyitaan apa-apa buku, rekod, komputer, loji perindustrian, kelengkapan, buangan terjadual, buangan, bahan berbahaya kepada alam sekeliling, bahan cemar, lesen, permit, perakuan, atau dokumen lain yang disita di bawah Akta 127, berhak kepada kos prosiding itu atau apa-apa ganti rugi atau relief lain melainkan jika penyitaan itu telah dibuat tanpa sebab yang munasabah. Seksyen 46D yang sedia ada hanya memperuntukkan bagi penyitaan apa-apa kenderaan atau kapal.

18. *Fasal 17* bertujuan untuk memasukkan seksyen baru 48AA hingga 48AE. Seksyen 48AA yang dicadangkan memperkatakan akses kepada data berkomputer oleh Ketua Pengarah atau mana-mana pegawai yang diberi kuasa secara bertulis oleh Ketua Pengarah.

Seksyen 48AB yang dicadangkan bertujuan untuk mengadakan peruntukan bagi fasal anggapan yang menurutnya adalah mencukupi untuk menganalisis sampel apa-apa bahan, yang disyaki buangan terjadual, yang terkandung dalam beberapa bekas. Jika analisis membuktikan bahawa sampel itu adalah daripada sifat dan perihalan yang sama, hendaklah dianggap sehingga dibuktikan sebaliknya, bahawa kandungan semua bekas itu adalah sama sifat dan perihalnya dengan sampel yang dianalisis. Seksyen ini akan membantu dalam proses penyiasatan dalam kes jika keterangan yang terlibat adalah dalam kuantiti yang besar.

Seksyen 48AC yang dicadangkan bertujuan untuk mengadakan peruntukan bagi kuasa tambahan Ketua Pengarah atau mana-mana pegawai yang diberi kuasa secara bertulis oleh Ketua Pengarah bagi maksud pelaksanaan Akta 127.

Seksyen 48AD yang dicadangkan bertujuan untuk menjadikan suatu kesalahan bagi mana-mana orang untuk enggan memberikan akses kepada Ketua Pengarah atau mana-mana pegawai yang diberi kuasa secara bertulis oleh Ketua Pengarah

kepada mana-mana kenderaan, kapal, kapal terbang atau premis yang Ketua Pengarah atau mana-mana pegawai yang diberi kuasa secara bertulis oleh Ketua Pengarah berhak kepadanya dalam melaksanakan apa-apa kewajipan atau kuasa di bawah Akta 127. Seksyen ini selanjutnya bertujuan untuk menghukum mana-mana orang yang mengamang, menghalang, menyekat atau mengganggu Ketua Pengarah atau mana-mana pegawai yang diberi kuasa secara bertulis oleh Ketua Pengarah dalam melaksanakan kuasanya di bawah Akta ini.

Seksyen 48^{AE} yang dicadangkan bertujuan untuk mengadakan peruntukan bagi pencantuman kesalahan. Peruntukan ini membenarkan seseorang yang dituduh bagi lebih daripada satu kesalahan di bawah Akta 127 untuk dipertuduh dan dibicarakan dalam satu perbicaraan bagi apa-apa bilangan kesalahan itu yang dilakukan dalam apa-apa jangka masa.

19. *Fasal 18* bertujuan untuk memperuntukkan bahawa kuasa, kewajipan dan fungsi di bawah Akta 127 berkenaan dengan pengeluaran lesen, penyiasatan kesalahan dan penguatkuasaan Akta 127 boleh diwakilkan kepada perbadanan juga.

20. *Fasal 19* bertujuan untuk memasukkan seksyen baru 49A dan 49B. Seksyen 49A yang dicadangkan mengenakan kewajipan ke atas pemunya atau penghuni premis untuk mengambil kerja orang yang berwibawa untuk menjalankan aktiviti antara lain, untuk menyediakan dan mengemukakan laporan, pelan, cadangan, lukisan kejuruteraan atau dokumen lain yang berhubungan dengan perkara alam sekeliling.

Seksyen 49B yang dicadangkan bertujuan untuk mengadakan peruntukan bagi ganjaran kepada pemberi maklumat yang memberikan apa-apa perkhidmatan, maklumat, pernyataan atau bantuan berhubungan dengan pengesanan apa-apa kesalahan di bawah Akta 127.

21. *Fasal 20* bertujuan untuk melindungi pemberi maklumat dengan merahsiakan identiti pemberi maklumat daripada diketahui. Walau bagaimanapun, mahkamah mempunyai kuasa untuk mendedahkan pemberi maklumat jika mahkamah berpendapat bahawa keadilan tidak dapat dilaksanakan tanpa pendedahan pemberi maklumat itu.

22. *Fasal 21* bertujuan untuk menggantikan perenggan 51(1)(t) dengan perenggan yang baru untuk menjadikan teks bahasa kebangsaan konsisten dengan teks bahasa Inggeris.

Selanjutnya, *fasal* ini bertujuan untuk meminda subseksyen 51(1) Akta 127 dengan memasukkan perenggan baru 51(1)(tt) untuk memberi Menteri kuasa untuk membuat peraturan-peraturan tentang apa-apa perkara yang berhubungan dengan penilaian kesan kepada alam sekeliling.

Kemasukan perenggan 51(1)(w) dan (x) bertujuan untuk memberi Menteri kuasa untuk membuat peraturan-peraturan berkenaan dengan orang yang berwibawa dan kecekapan penyedia latihan yang menyediakan latihan dalam lapangan alam sekeliling, masing-masing.

23. *Fasal 22* memperkatakan peruntukan kecualian dan peralihan.
24. Pindaan lain yang tidak diperkatakan secara khusus dalam Huraian ini merupakan pindaan yang kecil atau berbangkit.

IMPLIKASI KEWANGAN

Rang Undang-Undang ini tidak akan melibatkan Kerajaan dalam apa-apa perbelanjaan wang tambahan.

[PN(U²)2624]